

**VENDIM**  
**Nr. 220, datë 10.8.2026**

**MBI LICENCIMIN E SHOQËRISË “GLOBAL INTERPRISE GROUP” SHPK NË  
VEPRIMTARINË E PRODHIMIT TË ENERGJISË ELEKTRIKE**

Në mbështetje të neneve 40, pika 2, germa “a”, 41, pika 1, germa “a”, dhe 136, pika 2, të ligjit nr. 59/2026, “Për sektorin e energjisë elektrike”; të neneve 4, pika 1, germa “a”, 5, pika 1, germa “a”, 13 dhe 14, pika 9, të “Rregullores për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike”, të miratuar me vendimin e Bordit të Entit Rregullator të Energjisë (ERE) nr. 109, datë 29.6.2016, të ndryshuar; si dhe të nenit 15, të “Rregullores për organizimin, funksionimin dhe procedurat e ERE-s”, miratuar me vendimin e Bordit të ERE-s nr. 96, datë 17.6.2016; Bordi i ERE-s, në mbledhjen e tij të datës 10.8.2026, mbasi shqyrtoi relacionin me nr. 1722/10 prot., datë 5.8.2026, të përgatitur nga Drejtoria e Licencimit, Autorizimeve dhe Garancisë së Origjinës “Mbi kërkesën e shoqërisë ‘Global Interprise Group’ sh.p.k. për licencim në veprimtarinë e prodhimit të energjisë elektrike”,

konstatoi se:

- Shoqëria “Global Interprise Group” sh.p.k., me shkresën e protokolluar në ERE me nr. 1722 prot., datë 1.6.2026, ka paraqitur kërkesën për licencim në veprimtarinë e prodhimit të energjisë elektrike nga HEC “Doma”, me kapacitet të instaluar 1.695 mw, me vendndodhje në perroin e Lusës, degë e Lumit Mat, Bashkia Klos, qarku Dibër.

- Bordi i ERE-s, me vendimin nr. 168, datë 15.6.2026, vendosi të fillojë procedurën për licencimin e shoqërisë në këtë veprimtari.

- ERE botoi njoftimin në median e shkruar për fillimin e kësaj procedure (në datat 16.6.2026 dhe 17.6.2026) dhe në përfundim të afatit të pritjes së komenteve apo objeksioneve nga të tretët (data 25.6.2026), nuk rezultoi të ketë të tilla. Njoftimi për fillimin e procedurës u botua edhe në rrjetet sociale dhe në faqen zyrtare të internetit të ERE-s.

- ERE, po ashtu, ka njoftuar Ministrinë e Infrastrukturës dhe Energjisë (MIE) për fillimin e kësaj procedure, nëpërmjet shkresës nr. 1722/4 prot., datë 18.6.2026, ku i ka kërkuar të bëjë me dije nëse nga ana e saj ka një qëndrim ndryshe, në lidhje me vlefshmërinë e kontratës dhe të drejtën e shoqërisë për ndërtimin dhe shfrytëzimin e këtij burimi gjenerues. Nga ana e MIE-s nuk ka pasur ndonjë qëndrim, në lidhje me fillimin e procedurës për licencimin e shoqërisë.

- Me shkresën nr. 1722/3 prot., datë 18.6.2026, ERE ka njoftuar shoqërinë për vendimin e fillimit të procedurës, si dhe i ka bërë me dije, në lidhje me informacionin/dokumentacionin që nevojitet të plotësohet në aplikim.

- Shoqëria, me shkresën e protokolluar në ERE me nr. 1722/5 prot., datë 29.6.2026, ka depozituar informacion/dokumentacion plotësues. Nga shqyrtimi i tij rezultoi se ishte i nevojshëm plotësimi i mëtejshëm i dokumentacionit, në lidhje me mbështetjen financiare, ndaj ERE iu drejtua shoqërisë me *email*-in me nr. 1722/6 prot., datë 9.7.2026.

- Si e tillë, me qëllimin për t’i lënë kohë shoqërisë të depozitojë dokumentacionin e munguar, Bordi i ERE-s, me vendimin nr. 192, datë 13.7.2026, vendosi të zgjasë afatin e vendimmarrjes me 30 ditë.

- Me shkresën e protokolluar në ERE me nr. 1722/9 prot., datë 23.7.2026, shoqëria ka depozituar dokumentacionin e kërkuar.

- Nga dokumentacioni i paraqitur nga shoqëria për qëllime të këtij aplikimi, rezulton se është depozituar korrespondencë me institucione të ndryshme shtetërore, lidhur me pengesat e hasura për zhvillimin e projektit në terren, si dhe dokumentacion gjyqësor nga i cili rezulton se shoqëria është palë në një proces gjyqësor me banorë të zonës, të cilët kanë kërkuar, pavlefshmërinë e disa akteve administrative, si dhe sigurimin e padisë, duke kërkuar pezullimin e punimeve deri

në përfundimin e procesit gjyqësor. Për këtë, shoqëria ka depozituar vendimin e formës së prerë të Gjykatës Administrative të Shkallës së Parë Tiranë, datë 16.10.2025, me anë të të cilit është refuzuar kërkesa e banorëve për sigurimin e padisë.

- Për rrjedhojë, vlerësohet se procesi gjyqësor në zhvillim nuk përbën, në vetvete, një rrethanë ligjore që pengon vijimin e procedurës administrative apo marrjen e një vendimi mbi kërkesën për licencim, për sa kohë nuk ekziston një vendim gjyqësor që të ketë pezulluar zbatimin e akteve përkatëse ose të ketë vendosur kufizime mbi ushtrimin e kompetencës së autoritetit administrativ. Megjithatë, duke mbajtur në konsideratë faktin se rezultati i këtij procesi mund të ketë ndikim mbi rrethanat faktike ose juridike mbi të cilat mbështetet kjo vendimmarrje, vlerësohet e arsyeshme që në vendimin e licencimit të parashikohet se ai do t'i nënshtrohet rishikimit në rast se depozitohet një vendim gjyqësor i formës së prerë, përmbajtja e të cilit afekton këtë vendimmarrje.

- Nga analizimi i këtij aplikimi, rezulton se shoqëria ka kryer pagesën sipas përcaktimeve të aneksit A dhe ka plotësuar dokumentacionin e kërkuar nga "Rregullorja për procedurat dhe afatet për dhënien, modifikimin, transferimin, rinovimin, njohjen dhe heqjen e licencave në sektorin e energjisë elektrike", miratuar me vendimin e Bordit të ERE-s nr. 109, datë 29.6.2016, të ndryshuar.

#### **Pajisja e shoqërisë me leje dhe miratime të tjera:**

Rezulton se shoqëria "Global Interprise Group" sh.p.k.:

- Ka nënshkruar me Ministrinë e Infrastrukturës dhe Energjisë nr. 642 rep., nr. 1977 kol., datë 27.12.2018, "Për ndërtimin, shfrytëzimin dhe administrimin e hidrocentralit 'Doma' me kapacitet prodhues 1.695 mw, në përroin e Lusës, degë e Lumit Mat, Bashkia Klos, qarku Dibër";

- Është pajisur me miratimin e pikës së lidhjes së HEC-it me rrjetin e shpërndarjes nëpërmjet shkresës së OSHEE-së sha nr. nr. 1491/2 prot., datë 25.7.2018, për kapacitetin 1695 kw;

- Është pajisur me lejen për përdorim burimi uhor sipërfaqësor nr. 40 prot., datë 26.12.2023, lëshuar nga Këshilli i Basenit Uhor (KBU) Mat, me afat vlefshmërie deri më 26.12.2028.

- Është pajisur me VNM paraprake, lëshuar më 7.9.2023 nga Agjencia Kombëtare e Mjedisit (AKM), për zhvillimin e projektit "Ndërtim HEC 'Doma'", me kapacitet të instaluar 1695 kw.

#### **Kushtet dhe afatet ligjore:**

- Shoqëria ka parashikuar se do të fillojë operimin e centralit në shkurt 2027. Në referencë të përcaktimeve të nenit 9, pika 2 të kontratës së nënshkruar me MIE-n, koncesionari merr përsipër të vërë në punë hidrocentralin brenda 24 (njëzetekatër) muajve nga data e marrjes së të gjitha lejeve për fillimin e punimeve dhe rezulton se shoqëria është pajisur me lejen e ndërtimit në datën 23.1.2025. Si e tillë, vlerësohet që në vendim të përcaktohet se ajo duhet të fillojë operimin brenda këtyre afateve, pra brenda datës 23.1.2027.

- Në referencë të përcaktimeve të nenit 10, të kontratës nr. 642 rep., nr. 1977 kol., datë 27.12.2018, ku parashikohet procedura e testimit të veprës, vlerësohet që t'i lihet detyrë shoqërisë që, brenda 60 (gjashtëdhjetë) ditëve nga fillimi i ushtrimit të veprimtarisë së prodhimit të energjisë elektrike, të depozitojë në ERE dokumentacionin përkatës për testimin dhe vënien në punë të veprës.

- Shoqëria aktualisht ka një leje uji të vlefshme (deri në datën 26.12.2028), por duke qenë se ky afat nuk mbulon të gjithë periudhën e vlefshmërisë së licencës, vlerësohet që të përcaktohet që shoqëria duhet të depozitojë lejen e ujit të përditësuar brenda datës 26.12.2028.

- ERE rezervon të drejtën e rishikimit të këtij vendimi në rast të depozitimit të sa lënë detyrë shoqërisë dhe në rast të depozitimit të akteve të ndryshme nga ato që kanë shërbyer për marrjen e këtij vendimi.

- Në përfundim, vlerësohet se shoqëria ka përmbushur kushtet për licencim, me detyrimin për të respektuar afatet dhe detyrimet e përcaktuara.

Për gjithë sa më sipër, Bordi i ERE-s

## VENDOSI:

1. Të licencojë e shoqërinë “Global Interprise Group” sh.p.k., në veprimtarinë e prodhimit të energjisë elektrike nga HEC “Doma”, me kapacitet të instaluar 1.695 mw, me vendndodhje në përroin e Lusës, degë e Lumit Mat, Bashkia Klos, qarku Dibër, për një afat 30-vjeçar.

2. Shoqëria duhet të fillojë ushtrimin e veprimtarisë së prodhimit të energjisë elektrike brenda datës 23.1.2027.

3. Brenda 60 (gjashtëdhjetë) ditëve nga fillimi i operimit, shoqëria duhet të dokumentojë në ERE testimin e veprës.

4. Shoqëria duhet të depozitojë në ERE lejen e rinovuar për përdorimin e burimit ujor brenda datës 26.12.2028.

5. Ky vendim është objekt rishikimi, në rast të plotësimit/mosplotësimit të kushteve të pikave 2, 3 dhe 4 të këtij vendimi, në rast të depozitimit të akteve të ndryshme nga ato që kanë shërbyer për marrjen e këtij vendimi, si dhe në rast të depozitimit të një vendimi gjyqësor të formës së prerë që afekton këtë vendimmarrje.

6. Drejtoria e Licencimit, Autorizimeve dhe Garancisë së Origjinës të njoftojë shoqërinë “Global Interprise Group” sh.p.k., Ministrinë e Infrastrukturës dhe Energjisë (MIE), “OSSH” sh.a., “FTL” sh.a. dhe ALPEX sh.a. për vendimin e Bordit të ERE-s.

Ky vendim hyn në fuqi menjëherë.

Çdo palë e përfshirë në këtë procedurë mund t’i kërkojë ERE-s, brenda 7 ditëve kalendarike nga data e marrjes dijeni të vendimit, rishikimin e vendimit të Bordit në rast se ka siguruar prova të reja që mund ta çojnë Bordin në marrjen e një vendimi të ndryshëm nga i mëparshmi apo për gabime materiale të konstatuara. Për këtë vendim mund të bëhet ankim në Gjykatën Administrative Tiranë, brenda 45 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

**KRYETAR**  
**Petrit Ahmeti**